

Penularan COVID-19

'Bangkit, sekali lagi kita berjuang'

Dr Noor Hisham tiup kata-kata semangat petugas sedia perangi wabak

Oleh Muhammad Yusri Muzamir
yusri.muzamir@bh.com.my

Kuala Lumpur: "Kepada semua petugas barisan hadapan, kita sedang berdepan peperangan sangat besar dan negara bergantung kepada kita semua.


"Biar pun sering tidak lena tidur dan keletihan yang kronik, sapulah air matamu, bangkitlah, ayuh sekali lagi kita berjuang meratakan lekuk jangkitan," ungkap Tan Sri Dr Noor Hisham Abdullah.

Rayuan Ketua Pengarah Kesihatan itu dilihat sebagai peniup semangat kepada anak buahnya, yang bertugas di barisan hadapan menentang pandemik COVID-19 yang ketika ini, merekodkan peningkatan kes di seluruh negara.

Biarpun catatannya ringkas, ungkapan itu mengundang rasa seabak netizen yang membanjiri akaun Facebook beliau, sambil meninggalkan kata-kata semangat dan melahirkan penghargaan kepada petugas barisan hadapan Kementerian Kesihatan (KKM).

Rayuan Dr Noor Hisham menyusul dalam suasana negara sedang berdepan peningkatan mendadak kes harian jangkitan COVID-19, yang merekodkan tiga angka sejak tiga hari lalu.

Penularan pandemik COVID-19 di Sabah, menyebabkan KKM terpaksa menghantar pasukan ban-



tuhan dari Semenanjung untuk membantu operasi saringan di negeri itu yang kini meliputi enam kluster dengan 10,000 penduduk perlu disaring.

Pasukan bantuan perubatan itu akan dihantar secara berfasa, demi membantu pasukan perubatan hospital yang terkesan akibat peningkatan kes COVID-19 di Sabah.

Petugas KKM di Semenanjung pula, berdepan penularan jangkitan berpunca dari Sabah dicitus mereka yang pulang dari ber-cuti dan menyertai kempen pilihan raya negeri itu yang kini menyebabkan peningkatan kes di

setiap negeri.

Dr Noor Hisham berkata, petugas KKM kini bersiap sedia menghadapi jangkitan peningkatan kes baharu COVID-19 dalam tempoh di antara seminggu hingga dua minggu akan datang.

Katanya, KKM kini lebih bersedia dari segi peralatan dan pengalaman merawat pesakit COVID-19, jika dibandingkan ketika penularan pandemik bermula Mac lalu.

Beliau berkata, jangkitan peningkatan kes adalah berdasarkan susulan pengesanan aktif di kawasan tumpuan terutamanya kawasan Perintah Kawalan Per-

gerakan Diperketatkan Bersasar (PKPDB) di Sabah dan Kedah.

Katanya, pelaksanaan PKPDB bagi membendung jangkitan dan penularan COVID-19 dalam kawasan itu, membolehkan aktiviti pengesanan kes secara bersasar dilaksanakan sepanjang tempoh 14 hari.

"Aktiviti pengesanan sedang dijalankan di lapangan. Kita akan mendapat peningkatan kes yang tertumpu di kawasan itu. Kami jangka (kes baharu) akan meningkat dalam tempoh seminggu, dua minggu ini.

"Inilah tindakan kita dari mula lagi dan kita dapat lihat pengawalan kes jangkitan yang baik,"

katanya sambil berharap semua pihak bekerjasama mematuhi prosedur operasi standard (SOP) serta nasihat kesihatan yang dikeluarkan KKM.

Beliau berkata, KKM yakin kaedah kesihatan awam dapat memutuskan rantaian jangkitan seperti kejayaan negara menamatkan 101 kluster sebelum ini, yang menjadi kaedah terbaik mengawal penularan jangkitan kerana vaksin belum ditemui.

Selain menamatkan kluster penularan itu, Malaysia juga pernah merekodkan sifar kes penularan jangkitan harian di dalam negara pada 8 Julai lalu.

